

豫河志

于廷鑑署



豫河志卷二十四 職官二傳

楊方輿列傳 國史館本傳 節錄

楊方輿廣寧人後隸漢軍廂白旗天命七年以諸生來歸入直內院試列舉人授佐領銜擢內秘書院學士順治元年奉命總督河道黃河南北兩岸自流賊蹂躪無人防守伏秋汛發北岸小宋口曹家寨隄皆潰漫曹單金鄉魚臺四邑由南陽漫入運河潰沒田廬二年二月方輿請乘水勢稍涸鳩工亟築允行先是明崇禎時流賊李自成決汴水以灌汴梁其後決口屢基屢決至是命工部選員察勘馳奏令方輿修理七月河決流通集一趨曹單及南陽入運河一趨塔兒灣魏家灣入運河爲濁流所侵日就淤塞下流徐邳淮揚亦多衝決方輿以防護無功自劾諭令殫力河防不必引咎九月疏薦密雲道方大猷爲管河道四年通疏決口將合全河下注勢甚湍激由汶上縣決入濁山湖方輿因言河員必就近陞轉庶能熟諳河務奉諭施行尋以流通工竣加一級六年晉兵部尙書銜七年三月加太子太保八月河決荊隆口南岸漫單家寨西隄北岸漫朱源寨小長隄南岸旋塞全河盡入北岸決口轉向東北流方輿用管河道方大猷議先從上游築長縷隄遏其

來勢然後築小長隄決口期以春月鳩工半年歲事九年三月方輿以目疾請休得旨漕河重任實難其人卿籌畫素著宜悉心料理旋以汴河工成賜方輿及在事各員鞍馬白金有差時荆隆決口未合者尙三十餘丈大猷擢江南按察使方輿請勅部以新銜留管河務下所司議行會給事中許作梅御史楊世學陳斐交章請勘九河故道使黃河北流入海方輿因疏言黃河古今同患而治河古今異宜宋以前治河但令赴海有路可南亦可北故賈讓以不與河爭爲上策自元明以迄我大清定鼎燕京東南漕運由清口以至董家口二百餘里必藉黃河爲轉輸是治河即所以治漕可以南必不可以北欲挽北流而趨南自不得不逆其性而曲爲隄防故賈讓下策正今之上策也前人幾許經畫成此數千里長隄束水通漕若廢此不治順水北行無論漕運不通轉恐決出之水東西奔蕩不可收拾今議者乃欲尋禹舊蹟重加疏導勢須別築數千里長隄較之增卑培薄難易曉然且河流挾沙俱行束之一則水急沙流播而爲九則水緩沙積數年以後河仍他徙何以濟運議者又謂河經修築即當永遠無虞不知黃河自積石入中國後源遠支繁每遇伏秋汛發漫衍橫決有非隄岸所能禦者自殷周至今已事可考臣愚以爲河不能無

決決而不築司河者之罪也河不能無淤淤而不濬亦司河者之罪也若欲保其不決不淤誰敢任之明河臣潘季馴曰治河必無一勞永逸之功止有補弊救偏之策不可有喜新炫奇之智惟當收安常處順之休斯誠不易確論伏願敕下廷議定畫一之規屏二三之說俾河臣知所遵守不勝幸甚疏上嘉納之十年河決大王廟口距朱源寨口不遠給事中周體觀劾方興治河罔效耗帑害民罪方興遵旨回奏言臣自奉命總河九載疏築如法所有興工緩急役夫多寡並經請旨施行未敢稍有遲緩及擅加科派事因懇請罷斥奉旨向來河工皆就決處堵塞僅顧一時以致久無成效今山東又報河決現在會議楊方興且殫心料理毋致誤漕章內事宜下部一併會議方興再疏乞休慰留之十一年給事中林起龍劾方興堵塞朱源決口侵冒錢糧累民捐費至六十餘萬兩徇庇河道方大猷諸員奸貪不法命方興解任赴京質對起龍坐誣鑄秩命方興復任十三年方大猷以婪贓誤工爲直隸總督李廕祖所劾方興亦疏劾大猷以其不先舉發傳諭切責于是給事中董篤行疏劾方興徇庇下部議坐降級留任十四年引年乞休上以其久任河道總督勤總著勞命以原官加太子太保致仕康熙四年卒賜祭葬如典禮

楊方輿小傳 陸燦

楊方輿字淳然漢軍屈黃旗人初爲廣寧諸生天聰時直內院崇德元年取中舉人順治元年由秘書院學士授河東總督七年荊隆朱源寨口決直趨沙灣張秋一帶隄岸皆潰由大清河東奔入海兗濟以北皆罹其害萬民失業運道復梗方輿結茅廬於隄上盛暑隆冬寢食其中九年復決大王廟口衝潰沙灣方輿治塞如前並自西岸河邊起至八里廟河邊止開引河五百丈至十三年竣事其明年上疏乞休詔以勲練著勞加太子太保致仕懸車之後長安居第僅蔽風雨疏食布衣四壁蕭然康熙四年卒祭葬如例葉方恆全河備考曰張秋爲黃河下流其決於明世者正統十三年徐有貞治之弘治五年劉大夏治之皆費極浩繁功極艱難至是三歲再見卒用救寧蓋多於前功矣

朱之錫列傳 國史館本傳 節錄

朱之錫浙江義烏人順治三年進士改庶吉士授編修十一年七月擢宏文院侍讀學士十一月遷少詹事十二年十月遷詹事十三年閏五月遷宏文院學士十四年六月擢吏部右侍郎七月諭嘉之錫氣度端醇才品勤敏令以兵部尙書銜總督河道駐濟寧州十

六年正月疏言黃河建瓴萬里及入河南土鬆流匯泛溢之害無代無之前明二百餘年數興大役治水名臣如徐有貞劉大夏潘季馴等塞決口疏河身役夫俱八九萬至十餘萬糜帑不貲黃河自滎澤至陽山南北兩岸前明經營遺迹廢弛日甚謹酌盈虛權緹急條上一河南歲修夫役宜存舊額近以安瀾屢經奏減不知河本湍急未至橫流謂之曰安然其湍激之性固無分已決未決也伏秋水漲呼吸間淹岸數里迎流之處縱有重障如穿蒿葭其防之也高一丈長十丈之埽非數百人莫能推挽一里之隄非三萬餘工不成今歲所築閱歲而高者卑厚者薄加以濁流無定條北條南重隄不支退守月隄月隄之內不得不又議土工此夫役舊額萬不可議裁減一柳料宜預爲籌備令瀕河州縣各置柳園數區或取之荒地或就近河民田償價歸官每園置堡夫數名布種澆灌責成道廳稽察數年之後徧地成林不惟有濟河工而河帑亦可稍節一嚴剔誤工病民弊端凡供役之廠夫堡夫流夫隄夫閘夫淺夫舖夫有奸豪包佔賣富僉貧賄鬻私逃刻減工食之弊採買之柳稍磚石草柴蘆絲灰鐵糯米桐油有扣減價值交收梢索折乾肥私之弊器具之方輶活肺刮版厚斗鐵錘鐵鑊布兜竹筐鐵馬杏葉杓鐵簸箕五齒鐵扒鐵杵木

斧石礮雲梯有儲備不豫制作潦草之弊宜責司道府廳查報徇隱者以溺職論一釐覈
曠盡銀兩凡額設水夫天時陰雨而不赴工者爲逃曠所扣工食銀謂之曠盡恐不肖官
吏侵入私囊前河臣楊方興奏明每季起解河庫每歲冊報工部今宜令管河廳官立循
環簿每幅首行書州縣額夫若干工食若干中界爲三十格每日一格書夫幾名某所做
工有無逃曠後行書應扣曠盡總數每日送司道查核一慎重河工職守遇同知以下缺
員許薦盡心河務之人陞補吏部推陞亦先用曾經薦舉之人凡河員陞調降用俱令候
代始行離任一河官既有專責不應別膺差委一請復舊例歲終察核所屬賢否分別舉
劾以示勸懲一酌議派補夫食三月又言黃河毗連數省巡撫身任封疆境內河道不當
視爲非其職守致調集夫料各省參差請敕各巡撫共勦河務平時先事綢繆臨急從宜
搶救疏下部皆如所請行八月疏薦北河同知魏裔魯封邱知縣余縉儀封知縣崔維雅
等得旨敘錄先是之錫丁母憂以河工緊要令在任守制至是疏請回籍治喪准暫假數
月扶櫬回籍事竣仍即赴任十七年十二月之錫復任明年加太子少保康熙元年九月
河決原武祥符蘭陽之錫自往河南寒西閭寨單家寨時和驛蔡家樓管家寨諸決口是

年河南巡按劉源濬條奏南陽汝寧二府開墾荒地請免河工差徭十年部議令之錫奏核之錫言差徭宜均其勞逸新墾者偏逸則舊業之人偏勞酌定自今領墾地畝五年後起派雜差部議從之五年二月卒于官四月直隸山東河南總督朱昌祚疏言之錫治河十載殫力宣勞當旱溢相仍則拮据夙夜若隄渠挑濬則南北馳驅受事之初河庫貯銀止十餘萬兩頻年撙節現今貯庫四十六萬兩有奇核其官守可謂公忠體國其弟之璋稱之錫積勞嬰疾因河事孔棘不敢請告今歲北往臨清南至邳宿夙病日增回署身故年止四十有四未有子嗣籲請恩卹賜祭葬如例

朱之錫小傳

陸燿節錄

朱之錫字孟九號梅麓浙江義烏縣人順治三年進士改庶吉士四年授宏文院編修洊遷學士十四年由吏部侍郎出任河道總督承前任楊方興之後不屑屑於蕭規曹隨凡修守隄岸綢繆至計無不悉心擘畫如夫役工程錢糧職守及諸弊端興革損益皆商榷至當一一條奏報可初以內艱求去不允至十七年假歸營葬十八年再任經營河上先後十年未嘗有大工巨役數省之民獲免昏墊功著揚豫二省至今尸祝不衰康熙四年

以積勞憂鬱發病而卒贈太子太保祭葬如例

朱梅麓尙書事略

李元度

節錄

兵部尙書河道總督朱公之錫字孟九號梅麓浙江義烏人順治三年進士選庶吉士授編修十年遷宏文院侍讀學士尋遷詹事十三年晉宏文院學士明年擢吏部右侍郎令以兵部尙書銜總督河道康熙元年九月河決原武祥符蘭陽等縣公力籌堵塞自爲短歌俾適鐸徇行夫役皆踴躍趨事以是屢有成功公治河殫竭心力每當各工並急則南北交馳寢食俱廢盛暑介馬暴烈日中隆冬犯霜雪首尾十年先是壬寅秋歲大稔山左中州淮南道殣相望公設法倡賑全活甚衆著有寒香館河防疏略行世

按朱尙書國史本傳十一年擢宏文院侍讀學士李氏事略謂在十年似誤當以國史爲正又河南巡按劉源濟國史與李略皆書曰巡撫茲據河南通志改

佟鳳彩列傳

國史館本傳

節錄

佟鳳彩漢軍正藍旗人康熙十一年七月爲河南巡撫兼理河道十二年疏言豫省平定有年百姓苦累未蘇每歲修築黃河用夫七八千名或至萬餘名自二月至十月俱按地

畝起派似乎公矣然狡猾之徒以自己田土飛灑於人勢豪之家以他人地畝包攬於己甚至紳衿衙役借題優免致懦弱鄉愚愈累愈貧每月三四兩不等方能僱夫一名及解到河工又爲積年河工夫頭百計欺壓苦不能受勢必至於逃逃而提補又得二三兩重僱是每夫一月已費至六七兩矣卽以一歲萬夫初僱月需三四兩而計每年費至三四十萬今莫若官僱夫照順治十八年以前例每夫每月僱價二兩每歲上工九箇月每夫止用僱價一十八兩綜萬夫計之止用一十八萬兩其每歲估夫若干需銀若干除歲徵河銀外計通省地畝分別等則派銀足之刊明由單內我朝制度凡錢糧俱照明萬歷間則例此項似爲加派而派夫較之派銀所費不啻數倍曷若稍一更變每畝不過加之毫釐俾得安心就畝此歲修之議若是儻遇意外大工僱價浩繁或動何項錢糧又在臨時再行酌題者也疏下部議如所請得旨派夫累民允宜停止若派銀僱夫仍屬累民著照順治十八年以前例支河庫銀撥給如有不敷需動別項錢糧再行題請鳳彩又疏言豫省沿河地方雖云產柳然除隄柳園柳外俱民間納糧栽種以供採辦自康熙七年以來協濟江南河工之柳已二百七十餘萬束矣而本省歲修常需百餘萬去歲開封府屬陽

武縣之潭口寺工險事迫無柳可用將民間之桃李杏梨等樹盡行砍伐堵塞方保無虞是修防本省河工尙且不敷難以協運外省且豫省黃河水勢洶湧原無商旅巨艦往來不過各河口寥寥之渡船耳一遇協濟渡船不敷將小河民船從陸地挖溝引水拉至大河每隻只裝柳二三百束然尙有船可運也今朱仙鎮市舶見封鎖無已俱各畏縮不前大河又無片帆往來百姓運柳至河間者祇望洋而歎官吏束手無策若不急圖變通將來必至誤運現在協濟七里溝之柳九十餘萬束而隄柳園柳官給腳價銀一分五釐民柳連運脚每束給銀四分五釐向來運本省之柳修本省之工每束尙給銀五分今遠運江南千里之外止給四分五釐小民無術飛運安得不賠累乞敕河臣於江南僱船到豫使民止備辦柳束輓運河干嗣後就江南鄰近無河患處酌辦協濟留河南有餘不盡之柳梢以備本省河患庶百姓稍得蘇息大工不致遲誤矣疏下九卿道科道議行十三年十二月以疾乞休得旨解任調理南汝總兵周邦寧以士民籲留入告左都御史姚文然疏言鳳彩相貌議論樸實無奇而老成練達謹慎和平服官二十餘年皆能稱職其撫豫數載恤民疾苦民愛而信之傳聞告病以來百姓皇皇如失所倚恃宜令力疾視事資駕

輕就熟之益命鳳彩仍留任十六年七月卒於官賜祭葬如典禮諡勤儉

按河夫一疏已據河南通志錄入工程門而本傳所載較通志加詳至協濟南河柳束一疏則通志所未載也

靳輔列傳 國史館本傳 節錄

靳輔漢軍廂黃旗人順治九年由官學生考授國史院編修改內閣中書遷兵部員外郎郎中通政使司右通政擢國史院學士改內閣學士康熙十年六月授安徽巡撫十六年八月授河道總督二十四年九月疏言勘閱河南隄岸考城儀封陽武三縣應幫築隄工七千八百七十九丈封邱縣荊隆口應築大月隄三百三十丈滎澤縣應修築埽工二百一十丈以防上流異漲並請增設蘭陽儀封滎澤河員免開封歸德二府居民採辦青柳事下部議俱從之二十七年二月因被劾下九卿察議三月允九卿議革輔職以福建總督王新命代之二十八年三月復原品三十一年二月王新命以勒取庫銀爲運河同知陳良謨訐罷諭靳輔熟練河務及其未甚老而用之亦得紓數年之慮其令仍爲河道總督輔以衰病辭命順天府丞徐廷璽同往協理六月疏言前奉詔截留江北漕糧二十萬

石由黃河運至山西蒲州撥陝西賑濟臣因開封以西黃河淺深無定於五月初赴開封督飭趨催添僱民船隨淺隨剝撫臣閻興邦牒稱水路止可運至孟津由孟津陸運至蒲州臣今赴孟津料理十月疏言黃河自河南滎澤縣至江南清河縣兩岸各一千餘里其險工不可疏虞如南岸之在開封或疏虞則黃水入淮歸德至宿遷或疏虞則黃水入睢北岸之在滎澤或疏虞則黃河水上溢張秋下溢濟寧黃河隄工莫重於既成之後隨時修補隄根積水易致汕刷惟於上流量挖一溝引沙直注使停再於下流量挖一溝引水分洩漸去其低窪處自然淤平十一月卒於官賜祭葬如例諡曰文襄四十六年加增太子太保予騎都尉世職

靳文襄公事略 李元度 節錄

靳公諱輔字紫垣遼陽人隸漢軍廂黃旗康熙十六年授河道總督二十四年疏請添築考城儀封陽武三縣河隄七千八百丈有奇封邱縣荊隆口月隄三百三十丈滎澤縣埽工二百一十丈以防上流異漲又請增設蘭陽儀封滎澤河員免開歸二府民採辦青柳均從之三十二年仍爲河道總督會陝西西鳳漕郡災截南漕二十萬泝河而上貯蒲州

以賑秦民命公董其役公力疾就道經畫西運自清河至滎澤達三門砥柱安流無恙事竣抵淮疏陳兩河善後策及河工守成事宜幾及萬言十一月薨於位

按文襄著績在南河最多故王士禎撰墓誌銘王元啓作傳陸燿著治河名臣小傳皆載南河事無一語及東河者惟國史本傳著之李氏事略即采之國史故文襄實官國史院學士改內閣學士二王及陸皆誤爲武英殿學士禮部侍郎李氏事略則不誤又請築河南隄埽一疏已據東華錄載入工程門而考城儀封陽武三縣幫築隄工丈尺與本傳及事略微有不同河南通志又未載此次工程惟會典事例與東華錄同似本傳及事略誤也

崔維雅傳 大名志 節錄

崔維雅字大醇號默齋本新安人順治三年舉人任濬縣教諭因家於魏秩滿授河南儀封縣儀封瀕河歲苦河決維雅躬親畚鍤不避勞暑北岸三家莊爲從來要害地十四年水勢北注岸崩五里有餘維雅於上游十里故流處疏使東行北岸遂安復與塞封邱大王廟決口督撫連疏薦之擢江南淮安府同知旋改開封府南河同知十七年河決祥符

之槐疫痘露宿河上三月卒塞之明年復疏三家莊新河截舊河築壩全河盡東自是三家莊河不爲患遷浙江寧波府知府時王光裕奉命安輯浙海心識其才未幾光裕以副都御史總督河道遂薦維雅可用擢河南河道按察司副使沿河千有餘里夾河兩岸險工以數十計維雅常於冬春先事防之及伏秋水汛奔馳風雨相度修築皆得無事陽武潭口寺隄直河衝水勢迅急下埽輒蟄維雅預於上游疏引河待之是夏埽果不蟄北隄遂固虞城縣治距河隄僅數里隄沒入河北岸引河衝刷不利維雅預迎河溜挑之至秋水歸新河舊河遂爲平陸累遷江南按察使湖南布政使補廣西布政使入爲大理寺卿候補通政使卒著有河防芻議維雅三任河職於治水功尤著

張鵬翮列傳

國史館本傳

節錄

張鵬翮四川遂寧人康熙九年進士道庶吉士改刑部主事遷員外郎禮部郎中授蘇州甯州知府河東鹽運司遷通政司右參議轉兵部督捕右理事官擢大理寺少卿二十八年擢浙江巡撫三十三年擢兵部右侍郎三十六年遷右都御史三十七年遷刑部尙書授江南江西總督三十九年調河道總督條奏河工一隄工宜堅築加幫之隄應將原隄

作再加新土創築之隄先將平地奪深務期堅固一歲搶各工不無虛冒牽混之弊嗣後呈報險工估計申詳如係假捏即以誑報題參一挑河工程務將挑出之土堆于原估隄工奪礮成隄以資捍禦不許將散土堆集滋假河之弊一平常工料俱用龍尾埽遇風浪立見塌卸虛糜帑金應行停止一河水頂衝對岸必有沙嘴挺出此由河曲之故從曲處挑引河以殺水勢誠有如聖訓指示者而河員不卽遵行則以挑引河後必引大溜始能成河若水緩沙淤例應賠修因之人心畏縮臣思河工不如式者理應賠修若實心任事偶致淤墊者應請豁免一實心任事之員工程日優即叙用否則嚴加治罪一挑河築隄用夫動至數千寒暑風雨極其勞苦工成日應給印票免其雜徭以上各條請天語申飭勒石河干永遠遵行得旨河工弊端詳悉切要極其周備下九卿議尋議如所奏四十七年遷刑部尙書四十八年調戶部尙書五十二年調吏部尙書六十年九月直隸總督趙宏燮奏河南武陟縣黃沁衝決隄岸水溢至長垣等處山東巡撫李樹德奏河水泛溢自直隸開州流入山東張秋等處由鹽河入海致運河隄決漕船阻滯命鵬翮同總漕施世綸查勘十二月鵬翮等疏言臣等由山東張秋循流而上查黃河決口在武陟縣之釘

船幫支河口衝入詹家店之魏家莊及馬營口今副都御史牛鈕河南巡撫楊宗義於支河口築攔水壩魏家莊已經堵塞馬營口水已消落指日成工其引沁入運之處臣相度地勢西北高而東南下若引水直下恐牽動全沁灌入隄內而黃河直躡其後反覺無益山東運道在張秋則有沙河等水分水龍王廟則有南旺等湖濟寧則有馬場等湖又有諸山泉本可濟運祇因湖隄殘缺民間竊種湖旁之地未得蓄水而諸泉壅塞又未疏通以致漕船時患淺澀臣等已交李樹德築隄蓄水疏濬泉源運道自可通利得旨回奏甚屬明晰即令照依所奏不得稍有更改雍正元年授武英殿大學士六月河南黃沁漫溢決馬營口奉命查築三年二月卒加少保於卹典定例外加祭一次賜全葬諡文端八年詔祀賢良祠

附牛鈕列傳

國史館本傳 節錄

康熙六十年九月河南武陟縣馬營口河決以牛鈕諳練河工面授方略偕侍講齊蘇勒往堵築十月以巡撫楊宗義與河督趙世顯不亟備料奏敕宗義專其事牛鈕在釘船幫興工十一月工竣奉旨詳勘河工以儀封縣白家樓虞城縣黃垌壩應挑引河奏交署河